



**TERTIB ACARA KEBAKTIAN MINGGU  
GKPS P.BULAN-RESORT POLONIA MEDAN  
Minggu XIV Dob Trinitatis, 04 Oktober 2020**



**TOPIK:**

**“DOS ILOBENI TUHAN”**

Live streaming: [www.gkpspadangbulan.com/tv](http://www.gkpspadangbulan.com/tv)

Tata Ibadah: <http://www.gkpspadangbulan.com/tatib>

**1. *Votum – Introitus – Tonggo***

**P.** Riap ma hita jongjong!

Ibagas goranni Naibata Bapa pakon Tuhan Jesus Kristus pakon Tonduy Napansing, Sitompa langit pakon tanoh on. Amen. Marolob-olob anjaha marmalas ni uhur do ahu bani idop ni uhur-Mu, ai ikawahkon Ham do hadoyukonku, anjaha ibotoh Ham do hasosakan ni Tonduyhu. Halleluya... Halleluya... Halleluya...

P+K: Halleluya, halleluya, halleluya

**P:** Martonggo ma hita!

Ham Tuhan Naibata parkuasa, simada goluhnam. Roh do nuan hanami marsombah hu Bamu na dob mamilih hanami haganup gabe pagori ni kuria-Mu, na mambaen gabe par simada hanami bani haluahon in. Halani ai ibagas uhur na marolob-olob do hanami roh hu Bamu, mardingat ganup holong-Mu na bangga in. Tolong Ham ma hanami Tuhan ase totap mardalan bani dalan hasitongan ampa hapinton-Mu in. In ma tongon na gabe tandani na dob matoras hanami mangkagoluhkon Ambilan Na Madear in, pasu-pasu Ham ma hanami haganup kuria-Mu, ibagas Jesus Kristus Tuhan nami. Amen. *(Hundul kuria).*

**2. *Mandoding 304. Sada Goran na Majenges (1+2+4)***

1. Sada goran na majenges humbai ganup goran in Goran ni Tuhanta Jesus in do sijengesan in Goran-Mu o Tuhan sai dodingkononku in Goran-Mu Jesuskin na pamalum uhurhin

2. Sai na malum do uhurhu, domma sonang tonduyhin Goran-Mu, do sinajatanku, maralohon munsuhkin Goran-Mu, O Tuhan sai dodingkononku in Goran-Mu, Jesuskin na pamalum uhurkin

4. Sai dodingkon ma Goran-Ni, laho manaksihon in Paima das hita hu surga, lao manombah Tuhan in Goran-Mu, O Tuhan sai dodingkononku in Goran-Mu, Jesuskin na pamalum uhurkin

**3. *Hasasapan ni Dousa***

**P.** Riap ma hita jongjong!

Martonggo ma hita, sopotkon hita ma dousanta hubani Tuhan Naibata. Ham Jesus Kristus Tuhan na pansing anjaha na dob papansingkon hanami. Na mangaku do hanami, gati do lang ihargahon hanami hapansingon na dob ilayakhon Ham bannami marhitei goluh na ibagas habutakon. Pangkorhonni hamajuan ni jaman, lambin marbagei do horja–horja hadousaon na lang pitah parsedahon hauhuron tapi dihut do mangkorhon naboritni pardagingon. Lambin buei ma homa nalang mangkargahon angkulani marhitei horja panriah–riahon, mangindahi hasonangan marhitei na mamakei narkotika pakon obat terlarang, mambahen madabuh hubani naborit na mabajan. Holong ma atei-Mu sasap Ham ma dousa nami, urasi janah iankon Ham ma uurnami marhitei Tonduy-Mu ase lambin manggoluh ibagas hapansingon. Ham Tuhan holong-Mu tumang do na iarapkon hanami bani panggindoan nami on. Amen.

**P.** Tanggar anjaha haporsayai hita ma hata ni Naibata, bagah–bagah pasal hasasapan ni dousa:

*“Age pe gerger dousanima songon bunga ni dapdap, lopak do bahenon-Ku songon salju, age pe gerger songon hiou hasumba, putih do bahenon-Ku songon kapas.”*

Ibagas holong ni Naibata, domma isasap haganup dousanta. Halani ai, pataridahkon hitama tanda–tanda ni pargoluhan na bayu. Hasangapon ma bani Naibata i babou.

**P/K.** Amen

*(hundul kuria)*

**4. Mandoding 474. Roh Do Au Nuan Marsombah (1-2)**

1. Roh do au nuan marsombah hu Bamu Tuhan.  
Mansopotkon ganup dousa na borat tumang.  
sai holong ma Ham sasap Ham in,  
ase ulang au boratan ibaen dousakin.  
Holong-Mu tumang, pahampungkon in,  
ase au hinsah mardalan hu lambung-Mu in.

2. Gatinan do au manlembang humbai dalam-Mu,  
'ge domma buei ijin hujalo holong-Mu.  
Sai holong ma Ham, sasap Ham ma in,  
ase ulang au boratan ibaen dousangkin.  
Holong-Mu tumang, pahampungkon in,  
ase au hinsah mardalan hu lambung-Mu in.

**5. Hata Haporsayaan**

**P. Riap ma hita jongjong!**

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

**P+J.** Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei tonduy na pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei. Ahu porsaya bani tonduy na pansing, bani kuria parsadaan na mapansing in, parsaoan ni sagala na mapansing in, bani hasasapan ni dousa, bani parpuhooon ni angkula, pakon bani hagoluhan na sadokah ni dokahni. Amen! (*hundul kuria*)

**6. Tingting + Tonggo Pangapition**

**7. Mandoding 391. Majagiah do Goran-Mu (1+3)**

1. Majagiah do goran-Mu Naibata simada haganup kuasa.  
Kuasa-Mu manjadihon torsa jadi ganup na tinompa  
Kuasa-Mu do i surga homa ianan ni na porsaya

3. Mataniari pakon bintang torang, bulan pe hot do marsinondang.  
Ham do Tuhan na patupahon in, ase jorei haganup.  
Baen hagoluhan ni jolma in, ase sai ulang holsohan.

**8. Ambilan: 1 Musa 2:18-25**

**9. Manggalang:**

**P.** Paima iondoshon hita galanganta, tangar hita ma lobei hata ni Naibata na gabe onjolan banta laho manggalang, aima na tarsurat bani: **Psalmen 116:17-18** , " Bamu ma galangkoonku galangan puji-pujian, anjaha goran-Ni Jahowa ma padilo-diloonku. Bagah-bagahku bani Jahowa, hugalari ma, hugalari ma ilobei ni haganup bangsa-Ni. **Sonari ondoshon hita ma galanganta**

**446. Sisada Angkula**

1. Sisada angkula do hita ganupan, ragam ni pagori do hita tongon  
Na sombuh bayak dos do in bani Tuhan seng dong ilioi isarihon do tong  
Tuhanta do na gabe Hayu anggur, rantingni do hita on hajojor  
Jolom ma Jesus ulang ham pandur, ase tabun marbuah na ramos

2. Tanda ni sisada angkula do hita, rap marpangarapan bani goluh on  
Nai do bani horja rap marsiurupan, ulang dong na marsidalian ijin  
Tuhanta do na gabe hayu anggur, ranting-Ni do hita on hajojor  
Jolom ma Jesus ulang ham pandur, ase tabun marbuah na ramos

**10. Tonggo Galangan – Panutup – Pasu-pasu:**

**P.** Riap ma hita jongjong!

Ham Tuhan Naibata Bapanami, harohan ni haganup. Hun Bamu do harohan ni pasu-pasu hu bannami. Ibere Ham do bannami goluh ampa hagoluhan ari-ari. Ham tuhan ijon iondokon hanami do hu Bamu goluh pakon pasu-pasu na dob binere-Mu in bannami. Sai lambin margogoh ma tongon hanami ihasomani idop ni uhur-Mu ampa pasu-pasu-Mu bani na mandalankon horjanami. Papansing Ham ma galangan na ginalangkonnami on gabe galangan na misbou i lobei-lobei-Mu, ase lambin ihargahon hanami tongon dear ni layak pakon pasu-pasu-mu in marhitei na pasaudhon harosuh-Mu humbani gogoh, pingkiran ampa sinadongannami. Tarima kasih ma Bamu Tuhan. Marhitei Kristus Jesus Tuhannami, jalo ham ma galangan pakon tonggo name on. Amen.

**K. (mandodingkon) Haleluya No. 5:4**

Bamu sadokah ni dokahni, au on o Jesus Tuhankin,  
Ham ma lah haganup ompungni, gogohku pakon artangkin,  
Ai iberehon Ham darohMu, manggalar utang ni dousangku.

**P.** Ham Bapanami na i nagori atas. Sai na papansing ma goran-Mu. Sai roh ma harajaon-Mu. Sai saud ma harosuhni uhur-Mu i nagori tongah on songon na i nagori atas. Bere Ham ma bannami sadarion hagoluhan ari-ari. Sasap Ham ma dousanami songon panasapnami bani dousani hasoman na mardousa dompak hanami. Ulang hanami ibobai Ham hu parlahjouan. Paluah Ham ma hanami humbani pangagou.

**K.** (mandodingkon) *Ai Ham do simada Harajaon pakon Hagoluhan ampa Hasangapon sadokahi-dokahni. Amen.*

**P. (Pengutusan)**

Laho ma nasiam, janah baritahon nasiamma i tongah–tongah ni si pajuh begu–begu hamuliaon Ni, i tongah–tongah ni bangsa–bangsa halongangan binahen-Ni ai.

***Jalo hita ma pasu-pasu humbani Tuhan Naibatanta.***

Ipasu-pasu anjaha iparorot Tuhan Naibata ma (*ham*) hita. Isondangkon Tuhan Naibata ma bohi-Ni hubanta anjaha maidop ma uhur-Ni mangidah (*ham*) hita. Idompakhon Tuhan Naibata ma bohi-Ni (*hubamu*) hubanta, janah ipasorap ma damei-Ni bani (*tonduymu*) tonduyta bei. Amen.

**K.** (mandoding) Amen.. amen.. amen.